

Mid-Day Dogri News Bulletin, 20th March 2025

समे — 12:25

<><><><><><>

CM outreach office

जम्मू-कश्मीर सरकारै, समूलचे केन्द्र शासित प्रदेश थमां थोने आहली शकैतें ते दिक्कतें-परेशानिएं दे नबेड़े आहली बवस्था गी तगड़ा बनाने लेई मुखमन्त्री हुंदे सचिवालय च गै सार्वजनिक सेवाएं ते आम लोकें तोहड़ी पुज्ज आहले दफ्तर दी स्थापना कीती ऐ। इस पैहलकदमी दा मकसद लोकें दिए दिक्कतें-परेशानिएं ते शकैतें दे नबेड़े आहली प्रणाली गी चुस्त-दुरुस्त बनाने दे कन्नो-कन्नी सरकारी सेवाएं तोहड़ी लोकें दी पुज्ज गी होर बेहतर बनाना बी ऐ। एहदे लेई एडीशनल डिप्टी कमिशनरें गी राबता नोडल अफसर दे तौर उप्पर नियुक्त कीता गेआ ऐ। प्रशासनिक विभागें गी ऑफलाईन हासल होई दिए शकैतें उप्पर तुरत कार्रवाई जकीनी बनानी होग। एहदे अलावा जेके समाधान ते राबता पोर्टल दे राहें हासल होई दिए शकैतें गी उसलै तोहड़ी सक्रिय श्रेणी हेठ गै रक्खेआ जाह्ग जिसलै तोहड़ी उंदा नबेड़ा नेई करोआई दित्ता जंदा। एहदे अलावा जिला स्तर पर आयोजित होने आहले कैपें ते जागरूकता कार्यक्रमें दी निगरानी डिप्टी कमिशनरें आसेआ कीती जा करोग।

<><><><><><>

Panel Regularization

जम्मू-कश्मीर सरकारै बक्ख-बक्ख मैहकमें च कम्म करै करदे कैजुअल वर्करें ते ध्याड़ीदारें गी पक्का करने दी मंग पर अगड़ी कार्रवाई लेई मुख सचिव हुंदी प्रधानता तैह्त्त 6एं मैम्बरें आहली इक कमेटी खडेरी ऐ। एह पैनल, पिच्छले केइएं बरें थमां बक्ख-बक्ख मैहकमें च आरजी तौर पर कम्म करै करदे वर्करें दे सेवा सरबंधी मामलें दी व्यापक जांच करोग। एह पैनल इस सरबंधै च उचित हीलें दी सफारश करोग ते अपनी रिपोर्ट सरकार गी सौंपग।

<><><><><><>

JK Health Institutions

जम्मू-कश्मीर सरकारै जंदे रोज विधानसभा च एह जानकारी दित्ती जे खित्ते च बक्ख-बक्ख स्तरें उप्पर 4 ज्हार 200 शा मते सेह्त इदारे मजुद न ते नीति आयोग दी 2023 बरें आहली रिपोर्ट मूजब, सेह्त इदारें दी गिनतरी दे लेहाज कन्नै, जम्मू-कश्मीर, देसै दे अब्बल दर्जे दे

खित्तें च शामिल ऐ। विधायक शेख खुर्शीद हुंदे आसेआ पुच्छे गेदे इक सोआलै दा परता दिंदे होई सरकारै दससेआ ऐ जे माली बंदिशें दे चलदे मजूदा समें च सेहत सुविधाएं दा दर्जा बधाने दी प्रक्रिया गी हाल दी घड़ी रोकेआ गेदा ऐ। ऊ'आं, सरकारै, लोकें गी बेहतरीन सेहत दिक्खमाल आहली सुविधां उपलब्ध करोआने दे मकसद कन्नै ई—संजीवनी टेलीमेडिसिन मंच जनेई पैहलकदमी दे राहें सेहत सेवाएं दा विस्तार ते मजूदा ढांचे गी तगड़ा बनाने दी प्रक्रिया गी बरोबर जारी रखने दी जरूरतै उपर जोर पाया ऐ।

<><><><><><>

Model Panchayats Review

किश्तवाड़ दे डिप्टी कमिशनर राजेश कुमार शवन होरें जिले च आदर्श पंचैतें दी अमल—आवरी दा मूल्यांकन करने लेई इक व्यापक समीक्षा बैठक दी प्रधानता कीती। डिप्टी कमिशनर हुंदी अगुवाई आहली इस पैहलकदमी दा मकसद, शिनाख्त कीती गेदी 13 आदर्श पंचैतें च 82 महत्वपूर्ण विकास सूचकें गी शामिल करोआना ऐ। एहदा लक्ष्य इ'नें आदर्श पंचैतें गी किश्तवाड़ दिएं सभनें 136 पंचैतें च विकास मॉडल गी दोहराने लेई इक रूपरेखा दे तौर उपर इस्तेमाल करना ऐ। एहदे अलावा डिप्टी कमिशनर होरें औंदे माली ब'रे दरान आंगनवाड़ी केन्द्र स्थापित करने दी जरूरतै पर बी जोर दित्ता ऐ ते किश्तवाड़ दे ए.सी.आर. होरें'गी एहदे लेई जमीन दी उपलब्धता जकीनी बनाने दा निर्देश बी जारी कीता।

<><><><><><>

Army Commander Visit

फौज दी उत्तरी कमान दे कमांडर लेफ्टिनेंट जनरल एम.वी. सुचिन्द्रा कुमार होरें व्हाईट नाईट कोर दे जीओसी हुंदे कन्नै आईआईटी जम्मू ते आईआईएम जम्मू दा दौरा लाया ते उत्थे विद्यार्थि'ए ते शैक्षणिक अमले कन्नै नेतृत्व, नमिएं काह्डें ते राश्ट्री विकास बारै गल्लबात कीती। एह पैहलकदमी राश्ट्र निर्माण लेई थेहारबंद बलें ते शैक्षणिक संस्थानें बशकार सैह्योग गी मजबूत करने लेई भारती फौज दी वचनबद्धता गी दर्शादी ऐ। एहदे कन्नै भारत च शैक्षिक ते तकनीकी प्रगति गी बढ़ावा देने च फौज दी भूमिका गी बी बल मिलदा ऐ।

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” इस बारी 30 मार्च गी देश विदेश च रौहने आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 120मीं किश्त होग। कार्यक्रम च शामिल करने लेई लोक अपने बचार ते सुझाह 28 तरीक तगर टोल फ्री नंबर 1800-11-7800 पर भेजी सकदे न। एहदे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एहदे कन्नो कन्नी एहदा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग। एहदा डोगरी अनुवाद तुस रातीं 8 बजे इक बारी परतियै सुनी सकदे ओ।

<><><><><><>

Div Com NH 44

जम्मू दे डिवीजनल कमिशनर रमेश कुमार होरें रामबन च जम्मू-श्रीनगर राष्ट्री जरनैली सिडकै एनएच-44 पर जारी निर्माण कम्में ते गडिडएं दी आओजाई सरबंधी स्थिति दा जायजा लैता। इस सरबंधै च लाई गेदी बैठका च ट्रैफिक पुलसा दे डीआईजी, रामबन दे डिप्टी कमिशनर ते होरनें सरबंधत अधिकारिएं हिस्सा लैता ते रामबन च एनएच-44 दे किश हिस्सें पर जारी निर्माण कम्में दा गडिडएं दी आओजाई पर पवै करदे असर ते होरनें सरबंधत मामलें बारै गल्लबात कीती। डिवीजनल कमिशनर होरें ट्रैफिक मैहकमे सने राष्ट्री जरनैली सिडकें सरबंधी भारती प्राधिकरण दे रामबन आहले अधिकारिएं गी एह निर्देश दित्ता जे ओह अपने अमले ते मशीनें गी तैयार रक्खन तांजे जाम लग्गने ते होर दुइएं समस्याएं कन्नै फौरी तौर उप्पर निब्बडेया जाई सकै।

<><><><><><>